

# OLA

PULETINI A'OGA

2 IULAI 2018 ~ Lomiga 19 ~ Upega Tafailagi: [www.ola888.com](http://www.ola888.com) ~ Telefoni (03) 382 6674 ~ Tuatusi: [ola.niupac@gmail.com](mailto:ola.niupac@gmail.com); ~ [evaleon.books@gmail.com](mailto:evaleon.books@gmail.com) ~ E le faatauina ~ A Free Publication



## otootoga

E fa ni vaega tetele o tautua a le malo e ono savalia le ala ona o le tulaga i o latou totogi. E iai le aufaigaluega a le ofisa o Lafoga, o Pisinisi ma Galuega, o Tamaitai Tausima'i atoa ma Faia'oga. O lenei finauga mo le faaleleia o totogi na amata mai i taimi o le National. E iai lena a Tausima'i ma Faia'oga. O le vaiaso talu ai na tuu mai ai le ofo a pulega Falema'i, a o loo talia foi se tali a Faia'oga i le ofo a le malo. Ua fuafua le solotetee a tausima'i mo se 'afa aso. Tali mai le malo o loo fai pea feutaga'iga.

E 40 ni pulea'oga ua faavaeina nei se soofaatasi e faitiaina suiga ua faia i le NCEA. E aga'i tonu le faasea i le itiiti o se leo o a'oga i lenei fuafuaga. Na o le 16 vaiaso na tuu mai e le malo e feutaga'i ai, e manatu le soofaatasi ua laitiiti tele. E mau eseese foi le soofaatasi ma le malo i le aano o suiga e pei ona naunau i ai le minisita. E to'atele e lagolagoina pea le fa'auau o su'ega e tolu, i le tulaga na sau ai. O loo vaeluaina pea le matafaioi a'oga i le aoga o le NCEA o se su'ega.


Ua i lima nei o leoleo le mataupu i se ulugalii Saina e ana se pisinisi ua mauoloa ai. Na laua totogia ni tagata tusitusi polofesa e tusia pepa su'ega 'assignments' a tamaiti a'oga Saina i nisi o iunivesite a Niu Sila. E iai fale ma nisi meatotino na faatau i tupe e maua mai ai. Ua tuu atu nei e le faamasinoga i leoleo mo le toe faatauina atu, e totogi ai le \$4.7 miliona na laua maua mai lenei faiga. Na mua'i laga'ia lenei mataupu i le 2013 a o lea faato'a oo i le faamasinoga.

Ua fa'aalia le lagolago a le NZSTA ia latou pulea'oga, i se taugaupu sa fai e faatatau i le tiute o pule i le pulega o a'oga. O le NZSTA o le iuni a pule mavae (trustees) o loo nafa ma le vaaiga o kolisi a le atunuu. Sa laga le mataupu i luga o se tasi leitio i le mafaia e le pule ona fai le tiute o le pule a'oga ma toe fai foi le tiute o se pule mavae (governance). E mafua ai se isi taofi ua tatau ona tofia se pule faatonu (CEO) e fesoasoani i lona tiute faapule a'oga, ina ia lava lona taimi o se sui i le komiti faafoe (BOT). Fai mai nisi ua tatau ona lafoa'i le tiute faa pule mavae, ae le lagolagoina e le NZTSA sea faiga.



NUU PUAPUAGATIA: E le o se ata mai le Tusi Paia o malaia sa faaoo i nuu anamua, a o se mea o loo tupu nei lava. Talu mai le 2011 e 190,000 tagata Suria—tamā, tina, fanau ua maliliu. O le faitau aofa'i lena o Samoa. E 11.6 miliona ua tuua lo latou nuu ae sulufa'i atu i nuu tuaoi; laasia Europa ma avea ma ni faafitauli ogaoga a na malo. Faaigoa e le AMNESTY o le tāmā'i aupito tuga o lo tatou taimi. Faatasi ma lu'itau mai le suiga o le tau, o le a tula'i mai ai se lalolagi o suiga tulaga ese. O nisi malo e naunau e fesoasoani, taimua Farani ma Siamani; o isi ua fau pa maualuluga e taofi atu ai, e iai Amerika. Ua amata le tufatufaga o i latou i malo e nonofo ai.

## TUSI I LE MINISITA O CHRIS HIPKINS



E iloa le alofa i lona tino mai, e pei ona fai e se tama a'oga, 8 ona tausaga, i sana tusi na lafo i le minisita o A'oga, Chris Hipkins.

O lenei tama ua popole tele i le tulaga o faia'oga ma le ata o se lotoa a'oga e leai ni faia'oga.

Muamua o le a afaina le sipela, faitau pe tusitusi. Le iloa fai se numera, pe tupu se mu ae leai se tagata matua e lavea'iina le

fanau. O lana olega i le minisita, se'i vaai lelei nai faia'oga.

E atagia i le tusi a le tama le tulaga o le faiva ma lona faaesea mai filifiliga a le to'atele i galuega e fia galulue ai.

O le tasi tamaitiiti, ina ua fesiligia pe fia faia'oga, o lana tali, e le fia avea ma se tagata faanoanoa. E mafua ona o lana tilotilo i lana faia'oga, e faanoanoa lava lana pupula i taimi uma.

*Ripoti o le Vaiaso:*

## Amana'ia le sao o matua matutua atina'e o fanau

O se tala fiafia mo le mafutaga a le Grandparents Raising Grandchildren, pe faapea foi o Matua Matutua e tausia Fanau a fanau, ina ua tonu i le malo e amana'ia lo latou sao.

O lena amana'ia o le a totogi ai e le malo se alauni mo ofu a'oga i matua matutua; e amata lea i le aso 1 o Iulai 2018.

E 4200 le aofa'i o sui o le GRG, o le tele o nei sui e tausia fanau a fanau o se galuega tumau, o isi foi e faale-tumau. Ae fuafua lava le umi ma le uiga o le tausiga i le tulaga o fanau i totonu o aiga.

E iai fanau ua leai ni matua ona o faalavelave ma tulaga masani e tutupu i le va o le tamā ma le tina.

O le to'atele e lavea i le vaega o le tausitama a o galulue matua pe toesea i nisi fuafuaga.

O isi foi e avatu faamalosi i ai le tiute pe a le toe faatuatuaina matua ona o aafiaga i sauaga ma vailaau faasāina.

E \$101.9 miliona na togia i le tala o le tupe mo ofu a'oga o fanau i le vaega lea; e talitonu le pulega a le GRG o se faamama avega tele i ana sui o loo nafa ma le tiute.

E \$1500 a le tamaitiiti i le tausaga

ma sa le'i maua e matua matutua ae na o matua tausia (foster parents) sa totogi i ai.

Lenei la ua suia i le tula'i mai o Ardern ma le malo fou.

Pe tusa ma se 7000 matua matutua o loo tausia fanau a a latou fanau, pe a ma se 12,000 le

aofa'i o tamaiti e aofia ai. O se fua faatatau ae talitonu e ono sili atu.

O le ava lea i le tulaga sa iai, auā sa lei amana'ia e le malo le tau o ofu a'oga; o se tau sa totogi lava e le tele o matua matutua mai a latou penefiti.

O nisi o matua matutua e leai sa latou filifiliga, ma toe tauave ai le tiute ona ua leai lava se isi filifiliga e sili atu mo le fanau laititi.

E sili ia i latou le tausia o fanau laititi i lo le tuu atu e vaai e ni aiga poo nisi e le masani ai.

Peita'i o se lu'i tele mo nisi o i latou, pe a fua i le matutua ae toe feagai ma le



Matua matutua ma lo latou sao i le tausiga ma le faafailelega o fanau laititi, e iloga

tausiga o ni fanau laititi. O nisi o na fanau o loo feagai foi ma ni faafitauli ma atili faigata ai le galuega.

I nisi aiga pe na o se tina matua ma le fanau laititi, a maua se lagolago mai ni sui o le aiga poo se mafutaga lotu o se ponesi lea.

Ae faamoemoe mea uma i le faasoa tauseleni e faavae ai se tausiga paleni, ma tuumāmā ai le mamafa o le avega mo matua matutua.

Saunoa le ta'ita'i o le GRG, o se tonu lelei lenei ua faia e le Minisita ma le malo, ma e le taumate sona iuga lelei mo le atunuu ma lona atina'e lautele.

## Avea matati'a lē ausia ma faavae o nisi suiga

Sa maualuga le taofi e laasia ni matati'a fou i le numera o e ulufale i iunivesite poo le tapulaa teseri a le atunuu i le 2017. Ae leai, ua faamaonia i le sailiga e lei maua le 80,000 sa fuafuaina. E 26,000 le numera e maualalo ai.

Sa faavae le taofi i le fuafuaga a le Leipa e a'oga fua le au ulufale, ma sii ai i luga le numera o Niu Sila e avanoa i se a'oa'oga teseri (tulaga tolu).

I le folasaga o numera na iloa ai le le ogatusa o mea sa taumate ma le tulaga moni o mea ua tutupu.

Sa faapea e fetau le faia'e o le numera e ulufale ma le malosio o le maketi faigaluega; a o lea ua tula'i mai ua muamua i luma le maketi ae tautosu atu i tua vae o tapenaga e ala i a'oga ma toleniga o le aufaigaluega.

I le folafolaga a le Leipa e foliga na avatu uma lana faamuamua i le iunivesite. E manatu ai nisi ua ama lana tilotilo i politeki ma tautua e ta'u ai Maori ma le Pasefika.

O lea faaaliga fou ua avea nei ma

faavae o nisi fuafuaga fou mo le minisita o a'oga.

E iai le toe asia o politeki ma tautua na e tapena ai fanau mo galuega faufale ma le vao matata eseese, poo na o loo maualuga le alumia i le maketi faigaluega.

Ua iai foi se fuafuaga e si'i totogi o mataupu i le a'oga ina ia mafai e pulega ona faatino lelei le galuega. E

o faatasi lena ma se siitaga i le fesoasoani a le malo e ala i pili o le 'aua'o'oga.

E tusa ma se 33,000 le aofa'i o le 'aua'o'oga o loo totogi e le malo o latou pili.

E lavea i le ata le tulaga fai ifo o le numera o i latou e fia avefa ma ni faia'oga. I le taimi nei ua saili atu a'oga ma le malo i fafo. E le gata i A'oga a o isi matafaioi e iai le Fau fale. Ua toe fetuuna'i ai ma le anava a le malo i mea tau femalaga'iga.



O loo tau saili pea e le malo le fausaga aupito lelei i ana faiga faavae e ogatasi ai A'oga ma Galuega faapei o le futia ma le umele. Fai mai le Leipa na leaga mai mea i le National ma ana atagalue faapisinisi. Ae tuua'iina foi le malo e le National i lana anava o femalaga'iga e taofiofi ai le ulufale; a o lea e mana'omia nisi e faigaluega.

*Faasoa o le Vaiaso: Levi Tavita*

## Tina ma tamā matutua o puna'oa o le gagana

Ua leva lava ona silafia ma tatou iloa lenei mea, o le to'atele o i tatou o tama ma teine a'o'oga a matua o matua. O i latou o tatou ulua'i faia'oga i le gagana; mai lava i le taimi e ulufale ai i le lalolagi, o foliga muamua nei e tau i ai le pupula. O leo nei e muamua ulufia le faalogo ma le mafaufau.

Tele o taimi o le olaga tauafua e mafuta ai fanau laiti ma o latou matua matutua; e nonofo i le fale a o aga atu matua i fe'au ma tiute o le aso.

E taua tele lea taimi i le atina'e o le mafaufau, molimau mai le saienisi, auā o le periota lea e faamautu ai faavae o se mafaufau maloloina mo soo se tagata. E faamoemoe tele lea i le sao a se gagana i lona fagaina.

E mulimuli nei ona tatou iloa se sootaga faasaienisi ina ua maua sea malamalama, a ua leva lava ona soifua mai ai o tatou tagata.

E fafaga fanau i upu ma tala, mai lava a o laiti; a o tama a manu e fafaga i fuga o laau.

I Niu Sila nei e amana'ia le sao o matua matutua i le tausiga o fanau a fanau. E totogi, o lea foi ua ofoina le alauni o ofu a'oga ma o le a avanoa i ai nisi o i latou mo le taimi muamua.

O se faaiuga amiotonu lea ma se faailoaga foi o le sao taua a i latou i le

atina'e o fanau, aemaise lava i le laasaga mu'amu'a o le olaga.

A saili le faia'oga e lelei le sipela o tina matua, le tusilima o tina matua, le faaleo manino, o tina ma tamā matua. Le faatonuga o le amio, o tina ma tamā matua.

E talitonu o ni faiga faapea mai le malo e faatupu ai le naunau ia i latou e auai fiafia i le galuega o le tapenaina o fanau.

O le taua o lenei sao auā e le tuli se'i saini se konekalate faigaluega; pau a lea ia avanoa i latou i le fanau e auala ai le fesoasoani.

E le masino molimau o fanau ua mautu i le gagana talu le faafailelega a tina ma tamā matutua.

E to'atele e fai ma le lotofiafia, alu ai a latou tupe i tau o meaa'oga a o lea faato'a tali mai le malo i lea vaega.

E leai se mea o iai, ae tatau foi i matua ona iloa fuafua. O nisi o matua matutua ua le toe lavātia e le malosi ona tausisi, ma a'oa'o ma fai uma na galuega. Ona o lea e mana'omia e i latou le fesoasoani.

E iai se tina matua Samoa o loo tausisi le fanau laiti a lana tama tama, maliu i se faalavelave. Molimau ia i le le faigofie o le tiute i lona matua ua iai. E tatau ona alapo i le taeao e tapena ma sauni i latou mo le a'oga; e alu e toe aumai; e tapena le mea'ai ma

fai tulaga uma na e masani ai matua tausisi fanau. Ae fai lava ona o pelega o fanau e ana fanau ua tuua.

E aogā foi i le faufauina o le sootaga o talavou ma le aumatutua. E iloga fanau sa faafailele e o latou matua matutua ma isi e lei faapena.

Ua tatou iai i se lalolagi o talavou ua latou le iloa le va tapuia, ua leai se fefe e faao'o manu'a pe ave foi le ola o se tina poo se tamā matua. Ae mafua mai i lena si'osi'omaga malulu o sootaga a o laiti; sa leai se mafanafana e ala i mafutaga ma matua matutua.

Sa leai se upu lelei e fagaina ai ae na o ata o sauaga ma le TV e fesaga'i.

E iai se isi na fesili pe aisea e le a'oa'oina ai le Hindi ma le Mandarin i le tele o a'oga, ae ese le to'a'aga a o latou tamaiti e fa'aaogā.

O le tali e maua i le aiga e nonofo faatasi; i faia fesaua'i o matua ma matua matutua e galulue uma i le faafailelega e ala i se gagana. Faapei o Samoa, e taua matua matutua; e amana'ia a latou upu ma fautuaga.

To'atele i latou e na o le tasi le gagana e fesoota'i ai, o lea foi e naunau ai fanau e faaolaola pea a latou gagana, ina ia faaualoa lea sootaga taua ma i latou.

O tamā ma tina matua o ulua'i faia'oga o le gagana. Aemaise lava i latou e fiafia e fa'aaoga le gagana e fesoota'i ai ma le fanau.

## E leo tele le faata'ita'i pe a naunau e faaualoa le gagana

E tofu tatou ma se faia i la tatou gagana. Auā e le tutusa mana'o; mo le faia'oga e aoga le gagana e a'oa'o ai mataupu o le a'oga, a o le matai e aoga e fatufatu ai se lauga o se maliu. Mo le to'atele, o fesoota'iga masani.

I nisi taimi o ai lava le failauga e malie ana upu o lena foi e ta'aina ai isi. E oo lava i lona leo ma ana taga.

Sa iai le taimi na lagona ai i Apia le tata'i o le siufofoga o Tui Atua, a o avea ma palemia. E iai nisi failauga ma ni sui o le atunuu ua pei lava o le palemia o latou si'ufofoga. E oo lava i upu.

O le alii fatuupu o Parate (Pratt) na fa'aali lona faanoanoa i le suiga o le gagana mai le t i le k, n i le g. Fai mai a ia ua faaleaga ai le gagana mamā.

I nei la aso ua tau le maua nisi e tautatala i le gagana i lona faaleoga mamā. A maua nisi o ni faifeau poo sina vaega o le aumatutua. E foliga ua mavaevae le fa'aaogaga o leo e lua; leaga pe a feiloa'i i talanoaga o aso

faisoo; lelei pe a lauga pe faitau le Tusi Paia i le falesa i le Aso Sa, pe i ni faasoa taua'oga. E nenefu le alaleo a le tagata ese i lea fesua'iga o leo.

O le popolega foi, ina ne'i alu a'i nenefu ai ma le fanau. Ua tau leai ni toe ulutaia e pei o matua matutua e maua i ai le faaleoga tonu o le gagana.

Sa afea i se tasi faasoa a le puletini le malosi o le tata'i a pese i le faaleoga tonu o upu. Aemaise pese na e fiafia talavou e faalogologo i ai. E iai lena i le UTube fai mai, i le 'ava ma le faaaloalo. Pe ta'u le aso o le 'aso. Atonu 'ana fesili i se toea'ina poo se tina matua, e maua ai le fesoasoani.

E le gata i le faaleoina a o le tusiga. E taua i soo se gagana lana kalama i vaega uma. I le itu i le sipela ma le vaevaega ua mae'a le galuega fita a e na faata'otoina. Tainane nisi atina'e fou, a ua mautu faavae e ta'ialaina ai.

Saunoa Tui Atua i lea faata'otoga e maua lelei i lena a le Tusi Paia Samoa.

E iai le fa'aaogaga o a tatou tama'i upu (a, e, i, o). Faapei o ni tamalii nei upu, e alala na o latou i o latou matuātala. O le o nominata e le luagia lana nofo; ma o se tasi vaega e iloa ai la tatou gagana, e iai mafua'aga e faavae ai.


O nisi o lomiga lotu e pei o na a le Molimau a Ieova o ni faata'ita'i lelei i le tusiga o a tatou upu.

O se tala fiafia foi pe a faasolo le vaai i le galuega a le aufainusipepa, mai le malo Samoa i sasa'e e aulia sisifo, o loo mau pea le nofo; tainane e le faigofie le tau faatulagaina. Le 'i' e fai ma faalavelave ae o loo fai pea ma le toaga le faiva.

O sina tau lea o loo tatou totogi mo la tatou gagana ma lona tausiga.

### **“mafauauga o le vaiaso”**

**E leai se siuleo aupito malie e tusa ma lou lava suafa** O se muagagana mai Amerika



## 1-7 IULAI

1

1845 Lulu se mafui'e malosi itu matu o Upolu

1894 Maliu Tupuivao

1942 Mae'a fauina o le malae Vaalele Faleolo

2

1962 Faatau atu faailoga lafo tusi a Samoa

2005 Malo Samoa ia Toga, Apia Park, 50-28

3

1877 Saini maliega va o itu taua e lua e amana'ia tulaga tuma'oti o Apia; i lalo o le faamalumaluga a Weber

1932 Faatasiga Mulimuli tagata Siamani a o lei toe faafo'ia le to'atele i Siamani

4

1949 Amata galuega o le

## Malumalu Metotisi Matafele

1997 Sui le igoa o Samoa i Sisifo ia Samoa

5

1963 Uia e le vaa Polenisia alavaa Faleolo-Aitutaki

6

1973 Maliu liga Kuresa, le na Fatuina Vii o le Sa'olotoga

1998 Faatonu Faamasinoga le togia atu o le \$50,000 e le Samoa Observer ia Tofilau Eti mo le taufaaleaga

2000 Teuteuga tulafono e sui ai le umi mo se tasi mai fafo e tauva i le palota mai le 12 i le 3 tausaga

2002 Faia'ina Samoa Aferika i Saute, Pretoria, 60-18

7

2012 Maliu George Milner, le na saunia le tusiupu Samoa, Egelani, i lona 93



# F

AI MAI LE FAAMAU a Kalama na usu gafa Tauiliili i Papa ia Taufau Tuiaana Tuiatua ona maua lea o Tupuivao. Na usu Tupuivao ia Iliganoataulaloese o le afafine o

Malietoa Taulapapa o Solosolo e iai Luamanuvae. Toe faapea mai Kalama na maliu Tupuivao i le aso 1 o Iulai, 1894. O le fesili, poo Tupuivao lea le tama a Taufau o le talafaasolo poo se tasi na ia tauave le suafa? O se fesili lea mo le ausu'esu'e. Auā a faamaonia o ia moni lea, ona foliga lea e toe fai se faatulagaga o aso o lo tatou tala, e fua i lona taimi. E manatu nisi e i tua o le lotu (Kerisiano) le taimi o Tupuivao. E iai mau e lagolago ai. Afai e faamaoni le faamau a Kalama, lona uiga na fanau o ia pe a ma le 1820 i le 1825. E iai le pine e faamaonia ai, o le loa pa'epa'e e tu i le lotoa LMS o Logologo i Matautu, Falealili. I le loa e iai upu nei: Na maliu le alii o Tupuivao i le aso 1 Iulai 1894. E mafua ai le isi fesili, Aisea ua faamau ai e Kalama lea mea pe afai na te iloa e le taua i le tala o Samoa? A o se fe'au lea mo le 'au su'esu'e.

O se tasi o maliu faamauina ma faamanatuina e lenei puletini o lena o George Milner. O Milner na saunia le tusiupu Samoa o loo toomaga pea i ai le fanau ma le ausu'esu'e i le gagana Samoa. O se galuega na faisao tutusa i ai Samoa e lua; ma o loo avea pea ma fua maualuga i le sipela ma le tusiga o upu o le gagana. E paga Milner ma Kalama i le tulaga o su'esu'ega e aofia ai Samoa e lua, atoa foi ma le aga mae'ae'a na tapenaina ai. E faitau tausaga taimi na galulue ai i la'ua i le faatinoga o a la'ua su'esu'ega. Na maliu Milner i lona aiga i South Petherton Somerset i Egelani; i lona 93. O lona aso fanau o Setema 9, 1918.

## Iulai i le Tala Faasolo o Niu Sila



1 Iulai 1988. Toe faafoi eleele Bastion Point i tagata Ngati Whatua

3 Iulai 1963. Pa'u le vaalele DC3 a le NAC i le Kaimai Range, 23 maliliu

6 Iulai 1923. Faalavelave nofoaafi i le soo Ueligitone ma Aukilani i Ongarue

7 Iulai 1916. Faavae vaega faaupufai a le Leipa

## NIUPAC PUBLICATION

Email: [evaleon.books@gmail.com](mailto:evaleon.books@gmail.com)

Phone: (03) 382-6674

Postal: 39 Basingstoke Street, Aranui, Christchurch 8061

All rights reserved. This bulletin and its content is protected by copyright laws of New Zealand and international conventions. Except for educational purposes, any other activity pertaining to its use is prohibited. OLA understands the rights of other copyright holders whose material we use and acknowledge always—apart from our own.

### Editor:

Levi Tavita, MPS, BTheol, BA, Grad Dip Tchg  
[ltavita8@gmail.com](mailto:ltavita8@gmail.com)

### Reporters:

Saili Aukuso, MA, BEd, DipTESL, DipTchg  
[saili.niupac@gmail.com](mailto:saili.niupac@gmail.com)

Vavaō Fetui, MA, BEd, DipTESL, DipTchg  
[ola.niupac@gmail.com](mailto:ola.niupac@gmail.com)

Photographer: Fili Fuaava

## EVALEON BOOKS & NIUPAC PUBLISHING


Telefoni (03) 382-6674. Tuatusi meliE: [evaleon.books@gmail.com](mailto:evaleon.books@gmail.com)



Sponsors:


Evaleon Books & Niupac Publishing

*Tautua e ala i le gaosia o alaga'oa mo a'oga (tusi mo le a'oa'o'ina o le faitau i le gagana Samoa, tusi e a'oa'o ai gagana, kalena, posters, yearbooks, brochures). E tautua fo'i i le fa'aliliuga o gagana, ma le tapenaina o ni tusi e fia lomia i so'o se sionara o fatuga.*



**TAALOGA PASO SAMOA ~ GAGANA E LUA**

1. Faatumu le pusa i upu/igoa Samoa poo se tasi e faatonuina. Fill the grid with the Samoan equivalents or any other as directed.



LPSTavita 2018 Copyright


**ACROSS**

- 1. buy (6)
- 4. park (4)
- 8. when (4)
- 9. wind (6)
- 11. joy (6)
- 12. corn (plant) (4)
- 14. rain (2)
- 15. can be eaten raw (of fish) (6)
- 19. Old Samoan boats for voyaging (4)
- 22. soap suds (2)
- 24. muscular (5)
- 27. fish baked traditional way (5)
- 28. spade (3)
- 29. give, present (5)
- 30. a ceremonial presentation of gifts to guests (5)
- 13. lest (3)
- 16. tidy up (3)
- 17. broken (3)
- 18. head of a country (2)
- 20. sermon (5)
- 21. shout (5)
- 23. be having children (4)
- 24. warrior (3)
- 25. chief's grave (3)
- 26. scoop (3)


**DOWN**

- 1. proceed in order (7)
- 2. America (7)
- 3. collect (2)
- 5. elope (5)
- 6. fetching (5)
- 7. tide (3)
- 10. gentleman (4)
- 12. midget (3)

Tusi e fesoasoani:



Solution ~ Tali



*Laufatu Samoa: O ni alagaupu a Samoa*

**O NI ALAGAUPU**

**A SAMOA ANAMUA**

**O le salamo vale a Mafua**

O Mafua o le alii o Salelavalu na tuu i ai le faiva o le ta tatau e le 'auuso tama'ita'i o Taema ma Tilafaiga. Ae iai tu'utu'uga. A fai se alofi i le 'ava magalo e muamua lava lana ipu. Peita'i o Mafua o se e tumu i le fa'aaloalo. E faalua ona ia faafitia le fa'aaloalo e taumafa muamua. O lea ua na le usita'ia ai le upu a tama'ita'i. O le iuga, ua toe ave ese le faiva mai ia te ia. Na toe salamo ma tu'itino, a ua tuai. E foliga ua ova le fa'aaloalo o Mafua. Pe sa faapea Mafua o le a atili alolofa ai tama'ita'i ia te ia, ae leai; ua iloa e tama'ita'i e gau ai le pisinisi ia Mafua.

**Ua ou ui ai i le ala i Sao**

Fai mai o le mafua'aga o le alagaupu o se misa i le va o ni tulafale se to'alua. O le tasi e sau mai Fatuvalu a o le isi mai Paia. O se faatau sa finau ai i le lauga. O le tulafale mai Fatuvalu na sau sauni, sa fai le malu taeao; a o le alii mai Paia e sau mole. O le iuga, na malo le finau a le Fatuvalu auā o loo malosi le tino, malosi ai ma le loto ma upu. A o le Paia na vave ona faalava le tootoo, ina o le a tau matapogia. E fa'aaoga le upu e faanoi ai pe a valaau mai se tasi e afe atu se'i fai le mea'ai, a ua uma ona tali le sua e afio mai ai. "Faafetai tele le fa'aaloalo, ua uma foi ona uia le ala i sao."

**Ua o le fotuga a Mosopili le faasausautua**

E nofo Mosopili i Foaluga, a o ona matua e alala i Foalalo. Na alu le fe'au e ta'u i ai o loo ma'i tigaina lona tuafafine; a ua le alu i ai e asi. Ua toe alu i ai le avea'i ma le isi, ma le isi, ae leai lava, se'ia oti le tuafafine. Ina ua ta'u atu ia Mosopili le mea ua tupu, ona tu lea ma tili vave atu ma se siapo i Foalalo. E mafua ai le alagaupu, e faatatau i se tagata e vave le alu i se maliu o se e pele poo se tauaiga; ae le'i alu e asi a o soifua pe gasegase. Poo se tasi foi e fia aliali i luma, ae iloa ane e leai se mea na faia i le faalavelave.

**O le maulalo a Tavai**

O le tavai o se laau o le vao e le maualuga tele lona tupu e pei o isi laau. E iai le mamalava, o se tasi e iloga le maualuga pe a faatusatusa. Ae fiafia lupe e aofaga i le tavai ae le o le mamalava. E faatatau i se tagata puupuu pe faaleiloga ae tautala ana galuega poo ni mea na te faia. Tusa pe maualuga le mamalava ae le afea e lupe, e o lava i le tavai. E le fauina ai foi ni fale poo ni vaa i le mamalava, ae atonu e aoga e faapaolo ai le fanua.

**O le faauta a Tavae'e**

Sa o ni alii se to'alua e tuli manu 'aivao. Ua lata ina po ona fai atu lea o le tasi i le isi, 'A alii Tavae'e, e lelei ona to ni o ta fale mau'u ne'i te'i ua timuga le po.' Ae tali Tavae'e, 'popole fua, e le timu. E mago vanu.' Ae na sese lana upu, na toto timuga, ona sulufa'i atu lea i le fale o lana uo. O le upu a lana uo, 'Malie, tatou te le ofi, o oe ma au ta'ifau, o a'u ma a'u ta'ifau. Ae lelei lou tou sulufa'i atu i vanu o loo mago.' Ua manino le faatatau, o se lapata'iga ia 'aia le melea ni fautuaga lelei.


Mai se tusi a Penisimani ma Palauni. O Penisimani o le alii Toga sa galue i le misiona Uesiliana i Samoa, sa ia faamauina nisi o alagaupu a le atunuu, e iai nisi nei; sa fesoasoani Siasia Palauni i le lomiga ma le faalauiloaina; ua toe faamatata e le OLA.



PASI ATU LA TATOU PULETINI I LE TOU A'OGA, AIGA, LOU TUAOI, AU UO, E AOGĀ MO LE FANAU A'OGA

Igoa: Koko le Kolila
Aso Fanau: 4 Iulai 1971—19 Iuni 2018
Ausiga: O se kolila e silia i se afe upu e fesoota'i ai ma tagata
Fetu: Kanesa

O le vaiaso talu ai, Iuni 19, na fa'alo mai ai Koko i le lalolagi ma i latou e iloa o ia mo le taimi mulimuli. I le lalolagi o le Saienisi ma su'esu'ega i le sootaga o tagata ma isi manu e felata'i faia, e tele ni mea fou ua maua mai i le teine o Koko. O Koko e mafai ona ia talanoa ma tagata e ala i le gagana o taga (sign language). E tusa ma se 1000 upu o le gagana Peretania na te iloina. O le vaega tele o na upu na a'oina i le va o le 2.5 i le 4.5 tausaga. Talu ai sea ausiga maoa'e na faamalosi ai le taofi e mafai e Koko ona tautala pei se tagata pe a a'oa'o lelei. Na te malamalama lelei i uiga e faailoa ai faalogona faaletagata e iai le faanoanoa pe a matamata i se ata; le aumomoo e fia fai pepe pei lava o tagata. E le gata la i le mafai ona fesoota'i i le gagana, ae mafai foi ona ia manatua ma taofi mea i lona mafaufau. Afai e tilotilo atu ua leai se nofoa i le mea sa iai, ona fesili lea poo fea o iai. E saga faamaonia ai e mafai e manu ona manatua mea sa tutupu i le taimi tuana'i. O se mea lea e fou i su'esu'ega tau le faiā o tagata ma uso a manu e iai kolila; e ta'u mai ai e felata'i tele. A o ola, e ta'uta'ua i ana faiga uo ma nisi o igoa ta'uta'ua i ata tifaga. E iai Robin Williams, na asiassi i le fale o Koko; e masani ona ta'u e Williams i ana faleaitu malie. E malosi le uiga faatina o Koko, e leai sana fanau ae fiafia tele e tausii fanau a pusi ma maile.



Tulimanu o Pola:

Upu i le soalaupule ma assignment pi'opi'o



E maualuga pea le viiga o le suafa o lo tatou Tamā o i le lagi, e pei ona tatalo lo tatou Alii Faaola.

Tele mataupu taua ua laga i la tatou lomiga o lenei vaiaso. Ae muamua atu le mataupu a le susuga ia Faraimo. Na talanoa mai o ia e faatatau i le mataupu i le aganuu ma le tulafono. Fai mai le mau a Faraimo e leai se soalaupule i le tulafono, ae malosi le soalaupule i le aganuu. I le aganuu e talanoa faatasi le matai ma lona 'auaiga, e le faia se tonu na o ia. Afai foi e moe le toa i le fono a matai, e toe foi mai le matai ma talanoa i lona to'alua ma le 'auaiga, ma toe faaoo atu se lagona i le fono.

I le tulafono ua iai nei, e pule le faipule i lona taofi; e le fesili i le nuu poo lona itumalo; o lona 'auaiga lea. E fai lava la latou faaiuga faavaega, ona ta'u lea o le pule a le tulafono.

O ina tonu e eseese ai pulega e lua. O le mea foi lea o loo fetoa'i ai le lotu ma le malo i lafoga, e tusa i le finagalo o Faraimo. E faavae ai lona talitonuga leai se soalaupule i pulega fou ua iai nei.

Ia, e momoli atu le faamalo i le susuga ia Faraimo, ae fiafia e tatala atu le faasoa i le mamalu o le aufaitau. Pe e te lagolagoina Faraimo pe leai foi. O le fesili, Faamata o iai se soalaupule i pulega a Samoa i nei aso?

O le mataupu lea i le ulugalii Saina ma le la sikimi e faipisinisi ai i mana'oga o nisi fanau, o se mea e faanoanoa ai tele. E iai la'u uo sa a'oga i Aukilani, fai mai e fiu e tapena sana assignment, ae aumai lava e sili ai le togi o le teine Saina. O ia e le talitonu, auā o i latou uma e lavea i le ESL, ae vaai atu i le faaupuga o le assignment e muliga le tusitusi a le isi polofesa. Sa tau i ai sona masaloga, ae leai se mea e mafai. Taimi nei la ua sili le fiafia i ana B sa maua i lo A a le 'au ula ia, lea ua faaali mai i le malamalama mea sa natia. Ina ia faia le mea tonu, ua tataua ona toe tilotilo iunivesite i lea tulaga. O nisi o na tamaiti ua mautulaga nei i galuega ona o togi sese. E leai se mafanafana e maua ai i nei mea.

Ae sa malosi le mafanafana i le hall o le toeaina faatonu o Tumamā Vili i Kalaiesetete. O se sailiga seleni mo le malumalu EFKS a Lotofaga, \$148,000 le seleni na maua. Malo le tautua nuu tautua lotu.

Ma le mataupu lenei i aiga sulufa'i. E mafua ona sulufa'i ona ua lamatia le ola; ae leai se isi e nofo fua fia alu i se isi nuu; vagana o le mativa. To'atele tagata Suria e fiafia i lo latou nuu a ua mafua le o ese ona o le leaga o e pulea. A tau ane lau silasila i ni foliga fou i lou magaala si'i i ai lou aao. E le iloa pe tau lona gafa ia Aperaamo ma Iakopo ma Repeka.

POLE MA PAPA



ATI A'E UPU:
tesi (n) 1. Kalama: o se vase e vavae ai se fuiupu mai le fuiupu atoa; faaoga foi e manava ai; Igilisi—dash. 2. tusitusi lolomi, text
tesile (n) Numera: faatatau i se vasega pe a vavae le faitau aofa'i o tagata i ni vasega e 10, e fua i tupe maua. Igilisi—decile
tesimale (n) Faighta o numera i vaegamea e faailo e le togi (.05)